
ПАРРАНДАЧИЛИКДА “БЕШАРИҚ ТАЖРИБАСИ” РЕСПУБЛИКАГА ОММАЛАШАДИ

Президент Шавкат Мирзиёев раислигида 2022 йил 31 май куни аҳолини озиқ-овқат маҳсулотлари билан узлуксиз таъминлаш чора-тадбирлари бўйича видеоселектор йиғилишида асосий турдаги озиқ-овқат маҳсулотларини кўпайтириш, жумладан, паррандачилик ва чорвачиликни қўллаб-қувватлаш масалалари муҳокама этилиб, бу борада Бешариқ туманида амалга оширилаётган ишлар ҳам эътироф этилганди.

Бугун вилоят ҳокимлиги ахборот хизмати ва АОКА вилоят бошқармаси ҳамкорлигида O'zbekiston24 телеканали, вилоят телерадиокомпанияси ҳамда вилоятдаги хусусий телеканаллар, босма оммавий ахборот воситалари журналистлари, Республика ахборот сайтлари вилоят мухбирлари ҳамда блогерлар иштирокида Бешариқ туманига пресс-тур ташкил этилди.

Пресс-тур давомида тумандаги паррандачилик йўналишида фаолият олиб бораётган “Зарқайнар дурдонаси”, “Бешариқ парранда” МЧЖ ҳамда “Водий насли парранда” фермер хўжалиги фаолияти, шунингдек, “ўсиш нуқтаси” паррандачилик бўлган “Кулолобод” МФЙда амалга оширилган ишлар кўздан кечирилди.

2020 йилдан буён иш олиб бораётган “Зарқайнар дурдонаси” МЧЖда 60 минг бош товуқлар бўлиб, йиллик гўшт ишлаб чиқариш қуввати 500 тоннани ташкил этмоқда.

30 нафардан зиёд ишчи-ҳодимлар меҳнат қилаётган “Бешариқ парранда” МЧЖ да эса 10 мингдан зиёд “Росс-308” кроссли насли она товуқлар, 70 мингта жўжалар парваришланмоқда. Бир йиллик инкубацион тухум ишлаб чиқариш 2 миллион донани ташкил этади.

Олий маълумотли 4 нафар ветеринарга эга бўлган “Кулолобод” МФЙ да 60 та хонадонда паррандачилик йўлга қўйилган. Маҳаллада ветеринария дорихонаси ҳам бор. Ҳоким ёрдамчиси фаоллиги, ветеринар-мутахассислар кўмаги ва маслаҳати билан 6 та хонадонга товуқ парваришлаш учун 180 миллион сўм миқдорида кредит ажратилган.

30 йилдан ортиқ тажрибага эга тумандаги “Водий насли парранда” фермер хўжалиги бугунги кунда Германиянинг “Helmann” компанияси технологияси асосида парранда боқишни йўлга қўйиб, товуқларнинг тухум бериш муддатини 18 ойдан 23 ойга узайтиришга ҳамда тухум бериш даражасини 25 фоизгача оширишга эришган. Фермер хўжалигида саноат усулида бир дона товуқ бир йилда ўртача 330-340 дона тухум берган ёки озуқа рационини оширмасдан 40-50 дона қўшимча тухум олмоқда. 90 нафардан зиёд бешариқликлар бандлиги таъминланиб, улар томонидан 380 минг бошдан ортиқ парранда етиштирилмоқда. Йиллик тухум ишлаб чиқариш қуввати қарийб 60 миллион дона бўлиб, маҳаллий ва хорижий бозорларга олиб чиқилмоқда. Тадбиркор Бохиржон Турдалиев корхона озуқа базасини мустаҳкамлаш мақсадида 2019-2021 йилларда 480 гектар фойдаланишдан чиқиб кетган ва яйловлар ўзлаштирилиб, сув тежовчи технологияларни жорий этган ҳолда ушбу майдонларда озуқа экинлари етиштириш йўлга қўйилганлиги ҳақида маълумот берди.

Паррандачиликдаги “Бешариқ тажрибаси” пресс-тур иштирокчиларида катта таассурот қолдирди.

Бизни ижтимоий тармоқларда кузатинг [Facebook](#), [Telegram](#), [Facebook](#), [YouTube](#), [Instagram](#)